

Suinicoltura: est ora de torrare a moer

Dae su 1978 sa Peste Suina Africana (PSA) at impedidu sa crèschida de sa suinicoltura in Sardinna, pro barantaduos annos, si non pro una rata dae su 2005 a su 2011, dae s'Ìsula non b'at essidu peta de porcu sardu.

Finas a su 2013, sa Rezione sarda aiat gastadu unu muntone de dinare, ma no aiat fatu nudda pro cuntrastare o brivare su pàsculu bradu, chi fiat sa neghe pro sa cale sa PSA sighiat a abarrarre in Sardinna.

In su 2014, sa Zunta rezionale, ghiada dae Frantziscu Pigliaru, aiat disinnadu de fàghere una gherra sèria a su pàsculu bradu e a sos porcos a fainu e de torrare a fàghere mòere a beru sa suinicoltura sarda. Difatis su *Piano straordinario di eradicazione*, fraigadu e atuadu dae s'Unità di Progetto (UdP) per l'eradicazione della PSA in Sardegna, dae su mese de ghennarzu de su 2015 aiat prevididu, pro sa prima borta, de brivare su pàsculu bradu e aiat regulamentadu sa catza a su sirvone.

Pro fàghere custu b'aiat chèrtzidu corazu, finas ca unos cantos pòliticos e opinionistas non cheriant chi sos porcos chi paschiant a fainu esserent ispèrdios. Finas una parte de s'opinione pùblica, a nàrrere su zustu minoritària, cheriat abarrare a su connotu. Sa bona parte de sa zente, imbetzes, non nde podiat prus de sas prepotènzias, de su de non respetare sas règulas, e de cussas pessones chi punnaiant a sos interessos privados in sos terrinos cumonales e duncas pùblicos, e chi fiant destruende e impoverende s'ambiente, e tratende male sas bèstias e su territòriu. Custa sensibilidade, ca sa zente aiat pigadu cussèntzia de su dannu siat sanitàriu siat econòmicu chi su pàsculu bradu fiat causende, aiat dadu galu prus fortza a s'UdP e intre su 2015 e su 2019 prus de 5.000 porcos chi paschiant a fainu sunt istados ispèrdios.

In cussos annos aiant dadu contributos a sos porcarzos pro si pònnerre in règula e postu finas sos porcos in sa *Misura* de su *Benessere animale*. De importu mannu finas s'atividade de informatzione e comunicatzione in totu sos zassos de Sardinna fata dae Confagricoltura pro sos porcarzos a pro sos tzitadinos.

Gràtzias a custu traballu in su ziru de pagos annos in Sardinna sa PSA si podet nàrrere chi nch'est ispèrdida, siat in sos porcos che in sos sirbones. S'ùrtima borta chi ant buscadu su virus de sa PSA in Sardinna est istadu in su mese de aprile de su 2019.

In prus, in custos ùrtimos annos, b'at àpidu unu cambiamentu culturale mannu: totus, oramai, si sunt sapidos chi a si pònnerre in règula, pesare sos porcos cun su sistema semibradu - in zassos tancados e controllados, garantende sa bioseguresa - respetare sas règulas de su benistare animale, cumbenit non solu pro s'economia ma finas pro s'ambiente e pro totu sa sotziedade.

Est ora, duncas, chi s' *Unione Europea* torret a cunsentire de pòdere bèndere in foras de Sardinna peta sarda e produtos fatos dae porcos nàschidos, parados e pesados in Sardinna.